

Headline **Paralimpiad Ke-14 Cungkil Bakat Baru OKU**
 Date **03. May 2008** Language **MALAY**
 Media Title **Utusan Malaysia** Page No **4,5**
 Section **Supplement** Article Size **1626** cm2
 Circulation **238082** Frequency **Daily**
 Readership **833287** Color **Full Color**



Paralimpiad ke-14

cungkil bakat baru OKU

MERIAH... Kemeriahan Paralimpiad Ke-14 mula dirasai sejak minggu lalu apabila larian obor sempena temasya sukan dwi-tahunan itu diadakan di sekitar Lembah Klang.



PRESIDEN Majlis Pemulihan Malaysia, Datuk Ghazali Yusoff (tengah) pada majlis larian obor sempena Paralimpiad Ke-14 di Petaling Jaya, baru-baru ini.

Oleh **SAYED HESHAM IDRIS**
(sukan@utusan.com.my)

SUKAN Paralimpiad Malaysia Ke-14 yang bermula hari ini akan menjadi medan bagi mencungkil bakat baru untuk diketengahkan pada kejohanan sukan untuk atlet kurang upaya (OKU) di peringkat antarabangsa.

Lebih menarik, kejohanan yang akan dirasmikan oleh Menteri Belia dan Sukan, Datuk Ismail Sabri Yaakob di Stadium Nasional Bukit Jalil, Kuala Lumpur, malam ini turut disertai oleh atlet yang pernah mewakili negara di sukan antarabangsa.

Apa yang lebih penting, temasya yang bermula hari ini hingga 9 Mei itu, diharap dapat meningkatkan kesedaran umum tentang perjuangan gigih atlet paralimpik negara.

Temasya kali ini juga penting untuk persediaan atlet dalam menghadapi Sukan Paralimpik di Beijing.

Pengurus Komunikasi Majlis

Paralimpik Malaysia (MPM), Ahmad Effendi Abdullah berkata, temasya itu akan mempertandingkan 14 jenis sukan.

Beliau menjelaskan, ia termasuk olahraga, renang, baling, tenis berkerusi roda, baling padang, bola sepak, catur, bola keranjang berkerusi roda, goalball, perahu layar, badminton, boccia, powerlifting dan ping pong.

Katanya, ia dibahagikan kepada enam kategori iaitu cacat anggota, cacat penglihatan, spastik, terencat akal, cacat pendengaran dan kerdil.

"Paralimpiad kali ini akan disertai 1,892 atlet dan pegawai dari 13 negeri, termasuk Wilayah Persekutuan Kuala Lumpur dan Labuan.

"Mereka akan ditempatkan di perkampungan sukan di Kolej ke-10 dan ke-11 Universiti Putra Malaysia (UPM), Serdang," katanya.

Tambahnya, beberapa venue sekitar Lembah Klang akan digunakan sebagai venue utama temasya sukan ini.

Sementara acara perahu layar akan dilangsungkan di Admiral Marina & Leisure Club, Port Dickson, Negeri Sembilan.

Venue lain ialah Stadium Nasional Bukit Jalil (olahraga), Pusat Akuatik Nasional Bukit Jalil (renang), Endah Parade Megalanes (boling), Pusat Tenis Nasional Jalan Duta (tenis berkerusi roda), Pusat Boling Padang Nasional Bukit Kiara (boling padang), Stadium Juara Bukit Kiara (badminton dan boccia), UPM (powerlifting, ping-pong, bola sepak, catur dan bola keranjang berkerusi roda) dan Pusat Latihan Pemulihan dan Perindustrian Bangi (goalball).

"Pada majlis perasmian sukan dwi tahunan kali ini, satu konsert khas akan diadakan di Stadium Nasional malam ini yang melibatkan artis tempatan dan luar negara.

"Antaranya, penyanyi Malaysia yang mencipta nama di Hong Kong dan Taiwan, Rynn Lim, kumpulan The Lima, Amuk, Phoebe Yap, MK, Cheng Lee, Will Ng, Revalthy, Nimmy dan Sitharthan," katanya.

Tambah Effendi, beliau berharap orang ramai dapat meluangkan masa untuk menyaksikan aksi atlet kurang upaya di venue acara berlangsung.

"Kehadiran penonton amat besar maknanya di hati atlet kurang upaya dan MPM berharap kejohanan kali ini mendapat sambutan," katanya.

Fakta:

- Sebanyak 12 atlet yang telah melayakkan diri ke Paralimpiik Beijing akan menyertai Paralimpiad Ke-14.
- Sebanyak 2,087 pingat ditawarkan pada kejohanan kali ini serta tiga trofi cabaran iaitu Jaguh Negeri, Piala Semangat OKU dan Piala GPN2010.
- Wang tunai sehingga RM3,000 akan diberikan sebagai insentif kepada atlet yang berjaya memecahkan rekod peringkat Paralimpiik, Fespik, Para Asean dan rekod kejohanan.
- Temasya sukan kali ini turut dijayakan oleh 800 sukarelawan yang terdiri daripada pelajar IPTA/IPTS.
- Sukan perahu layar akhirnya menjadi salah satu daripada 14 acara sukan pada Paralimpiad kali ini setelah ia menjadi acara demonstrasi pada Paralimpiad 2006.
- Paralimpiad sebelum ini dikenali Sukan Kebangsaan Bagi Orang Cacat Anggota Malaysia.
- Sejak diperkenalkan pada 1982, Paralimpiad telah melahirkan ramai atlet sukan orang kurang upaya antaranya Razali Jaafar dalam acara badminton sehingga ke peringkat Asean Para Games.

Jadual

- **Acara:** Bola keranjang berkerusi roda
Venue: Kolej 10 UPM
Tarikh: 4,5, & 6 Mei
- **Acara:** Badminton
Venue: Stadium Juara, Bukit Kiara
Tarikh: 3,4,5 & 6 Mei
- **Acara:** Olahraga
Venue: Stadium Nasional Bukit Jalil
Tarikh: 4,5,6 & 7 Mei
- **Acara:** Perahu layar
Venue: Admiral Marina & Leisure Club, Port Dickson
Tarikh: 4,5,6 & 7 Mei
- **Acara:** Boccia
Venue: Stadium Juara, Bukit Kiara
Tarikh: 4,5 & 6 Mei
- **Acara:** Goalball
Venue: PLPP, Bangi
Tarikh: 4,5, & 6 Mei
- **Acara:** Powerlifting
Venue: Dewan Pusat Sukan, UPM
Tarikh: 4,5 & 6 Mei
- **Acara:** Bola Sepak
Venue: Padang Kolej 2, UPM
Tarikh: 4,5,6 & 7 Mei
- **Acara:** Boling Padang
Venue: Stadium Juara, Bukit Kiara
Tarikh: 4,5,6 & 7
- **Acara:** Tenis kerusi roda
Venue: Pusat Tenis Nasional, Jalan Duta
Tarikh: 4,5,6 & 7
- **Acara:** Tenpin Boling
Venue: Mega Lane Endah Parade, Sri Petaling
Tarikh: 6,7 & 8 Mei
- **Acara:** Renang
Venue: Pusat Akuatik Nasional, Bukit Jalil
Tarikh: 6 & 7 Mei

(Semua acara bermula pukul 8 pagi)



REMAJA kurang upaya ini membuktikan kekurangan dirinya bukan penghalang untuk dia mencuba permainan papan selaju.



DATUK Bandar Petaling Jaya, Datuk Mohamad Roslan Sakiman (tengah) menyambut obor sempena larian obor Paralimpiad di Petaling Jaya, baru-baru ini.



OBOR sukan Paralimpiad meneruskan 'perjalanan' dari Petaling Jaya ke destinasi lain di sekitar Lembah Klang sempena larian obor di Petaling Jaya, baru-baru ini.